

四庫全書

史部

欽定四庫全書

史部

直齋書錄解題卷四

詳校官侍講學士臣法式善

編修臣程嘉謨覆勘

覆校官庶子臣鄒奕孝

校對官中書臣孫球

謄錄監生臣馮光熙

欽定四庫全書

直齋書錄解題卷四

宋 陳振孫 撰

正史類

史記一百三十卷

漢太史令夏陽司馬遷子長撰宋南中郎參軍河東
裴駙集註案班固云遷據左氏國語采世本戰國策
述楚漢春秋接其後事迄於大漢斯以勤矣十篇缺
有錄亡書張晏曰遷沒之後亡景武紀禮樂兵書漢

興將相年表三王世家日者龜策傳靳歙傳寬列傳
元成之間褚先生補作武紀三王世家日者龜策傳

案原本脫元成以下二十字今據文獻通攷補入言辭鄙陋非遷本意也顏

師古曰本無兵書張說非也今案此十篇者皆具在
褚所補武紀全寫封禪書三王世家但述封拜策書
二列傳皆猥釀不足道而其餘六篇景紀最疏畧禮
樂書騰荀子禮論河間王樂記傳靳列傳與漢書同
而將相年表迄鴻嘉則未知何人所補也褚先生者

名少孫裴駙即注三國志松之子也始徐廣作史
記音義駙本之以成集解竊嘗謂著書立言述舊易
作古難六藝之後有四人焉撫實而有文采者左氏
也憑虛而有理致者莊子也屈原變國風雅頌而為
離騷及子長易編年而為紀傳皆前未有其比後可
以為法非豪傑特起之士其孰能之

漢書一百卷

漢尚書郎扶風班固孟堅撰唐秘書監京兆顏師古

注本傳稱字籀恐當名籀而以字行也固父彪叔皮以司馬氏史記太初以後闕而不錄故作後傳數十篇固以所續未詳探撰前紀綴集所聞以為漢書起高祖終孝平王莽之誅二百三十年為春秋攷紀表志傳凡百篇自永平受詔至建初中乃成案班昭傳云八表並天文志未竟而卒和帝詔昭就東觀藏書踵成之今中興書目以為章帝時非也固坐竇憲死永元初不在章帝時師古以太子承乾之命總先儒

注解服虔應劭而下二十餘人刪繁補畧裁以已說
遂成一家世號杜征南顏監為左氏班氏忠臣

後漢書九十卷

宋太子詹事順陽范蔚宗撰唐章懷太子賢注案唐
藝文志為後漢史者有謝承薛瑩司馬彪劉義慶華
嶠謝沈袁山松七家其前又有劉珍等東觀記至蔚
宗乃刪取衆書為一家之作其自視甚不薄謂諸傳
序論精意深旨實天下之奇作然頗有畧取前人舊

文者注中亦著其所從出至於論後有贊尤自以為
傑思殆無一字虛設自今觀之幾於贊矣蔚宗父泰
祖寧皆為時名臣蔚宗乃以怨望反逆至於滅族其
與遷固之人禍天刑不侔矣然則豈作史之罪哉十
志未成而誅為謝儼蠟以覆車故惟存紀傳賢高宗
太子招集諸儒庶子張大安洗馬劉訥言等共為之
注賢坐明宗儼得罪武后廢死大安訥言亦流貶

續後漢書四十二卷

廬陵貢士蕭常撰

案原本脫此句今據文獻通攷校補

周益公序云曹

氏代漢名禪實篡特新莽之流亞丕方登禪壇自形
舜禹之言固不敢欺其心矣今隔千載好惡豈復相
沿而蘇軾記王彭之說以為途人談三國時事兒童
聽者聞劉敗則顰蹙聞曹敗則稱快遂謂君子小人
之澤百世不斬茲豈人力強致也歟

案通攷此上序語節去

陳

壽身為蜀人徒以仕屢見黜父又為諸葛亮所髡於
劉氏君臣不能無憾著三國志以魏為帝而指漢為

蜀與孫氏俱謂之主設心已偏故凡當時祫祭高帝以下昭穆制度皆略而弗書方且乞米於人欲為佳傳私意如此史筆可知矣其死未幾習鑿齒作漢晉春秋起漢光武終晉愍帝以蜀為正魏為篡謂漢亡僅一二年則已為晉炎興之名天實命之是蓋公論也然五十四卷徒見於唐藝文志及本朝太平御覽之目逮仁宗時修崇文總目其書已逸或謂世亦有之而未之見也幸晉史載所著論

案原本此下不載繁以隨齋批註蓋

有脫誤今據文獻通攷
所存周平園序校補

千三百餘言大旨昭然劉知

幾史通云備王道則曹逆而劉順本朝歐陽修論正
統而不黜魏其賓客章望之著明統論非之見於國
史近世張栻經世紀年直以先主上繼獻帝為漢而
附魏吳於下皆是物也今廬陵貢士蕭常潛心史學
謂古以班史為漢書范史為後漢書乃起昭烈章武
元年辛丑盡後主案通攷作少炎興元年癸未為續
後漢書既正其名復擇注文之善者並書之積勤二

十年成帝紀年表各二卷列傳十八卷吳載紀十一
卷魏載紀九卷別為音義四卷惜乎壽疏畧於前使
不得追記英賢憲章於後以釋裴松之之遺恨也

後漢志三十卷

晉秘書監河內司馬彪紹統撰梁剡令平原劉昭宣
卿補注蔚宗本書隋唐志皆九十七卷今書紀傳共
九十卷蓋未嘗有志也劉昭所註乃司馬彪續漢書
之八志爾序文固云范志今闕乃借舊志注以補之

其與范氏紀傳自別為一書其後紀傳孤行而志不顯至本朝乾興初判國子監孫奭始建議校勘但云補亡補闕而不著其為彪書也館閣書目乃直以百二十卷併稱蔚宗撰益非是今攷章懷注所引稱續漢志者文與今志同信其為彪書不疑彪晉宗室高陽王睦之長子多所著述注莊子及九州春秋之類是也

三國志六十五卷

晉治書侍御史巴西陳壽承祚撰宋中書侍郎河東裴松之世期注壽書初成時人稱其善叙事張華尤善之然乞米作佳傳以私憾毀諸葛亮父子難乎免物議矣王通謂壽有志於史依大義而黜異端然要為率略松之在元嘉時承詔為之注鳩集傳記增廣異聞大抵本書固率略而注又繁蕪要當會通裁定以成一家而未有奮然以為已任者豐祐間南豐呂南公銳意為之題其齋曰袞斧書垂成而死遂弗傳

又紹興間吳興鄭知幾維心嘗為之鄉里前輩多稱其善而書亦不傳近永康陳亮亦頗有意焉僅成論贊數篇見集中而書實未嘗修也

晉書一百三十卷

唐宰相房玄齡等修題御撰案唐藝文志為晉書者有王隱虞預臧榮緒謝靈運干寶等諸家太宗以為未善命玄齡修之與其事者褚遂良許敬宗令狐德棻李延壽敬播趙宏智等二十人

案新唐書藝文志預修晉書者有房

欽定四庫全書

卷四

玄齡褚遂良許敬宗來濟陸元仕劉子翼令狐德棻
李義甫薛元超上官儀崔行功李淳風辛丘馭劉引
之陽仁卿李延壽張文恭敬播李安期李懷
儼趙宏智等二十一人此書云二十人誤

宣武紀

題其陸機王羲之傳論太宗自為之故稱制曰而總
書曰御撰其凡例則發於敬播云

宋書一百卷

齊太子家令吳興沈約休文撰約永明中無著作郎
被勅撰本何承天山謙之蘇寶生所撰至徐爰勒為
一史起義熙迄大明自永光以來闕而不錄今新史

始義熙終昇明三年本紀列傳七十卷志三十卷獨
闕到彦之傳館閣書目謂其志兼載魏晉失於限斷
揆以班馬史體未足為疵至其所創符瑞一志不經
且無益其贅甚矣約後入梁為僕射侍中

齊書五十九卷

梁吳興太守蕭子顯景陽撰本傳稱六十卷子顯者
齊豫章王嶷之孫也

梁書五十六卷

唐宏文館學士京兆姚思廉撰思廉名簡以字行

陳書三十六卷

姚思廉撰初思廉父察嘗修梁陳二史未成以屬思廉後受詔與魏徵共撰思廉采謝灵顧野王等諸書
綜括為二史以卒父業

後魏書一百三十卷

北齊中書令兼著作郎鉅鹿魏收伯起撰始魏初鄧
彥海撰代記十餘卷其後崔浩典史為編年體李彪

始分作紀表志傳收搜採遺亡綴續後事備一代史
籍上之時論言收著史不平詔與諸家子孫共加論
討前後訴者百有餘人衆口誼然號為穢史僕射楊
愔高德正與收皆親抑塞訴辭遂不復論今紀闕二
卷傳闕二十二卷又三卷不全志闕天象二卷收既
以史招怨齊亡之歲竟遭發冢棄骨之禍隋文帝命
魏澹等更撰魏書九十二卷

案舊唐書經籍志新唐書藝文志俱一百七卷

以西魏為正東為偽義例簡要唐志又有張太素後

魏書一百卷今皆不傳而收書獨行中興書目謂所
闕太宗紀以澹書補之闕志以太素書補之二書既
亡惟此紀志獨存不知何據也

案宋史存澹紀一卷
太素天文志二卷

北齊書五十卷

唐中書舍人定武李百藥重規撰百藥父德林先已
創紀傳諸篇百藥因父業受詔成之

後周書五十卷

唐秘書監華原令狐德棻撰初德棻武德中建言近

代無正史詔德棻及諸臣論撰歷年不能就罷之貞觀二年復詔撰定議者以魏有收澹二家書為已詳唯五家史當立德棻與岑文本崔仁師次周史李百藥次齊史姚思廉次梁陳史魏徵次隋史房元齡總監而修撰之原自德棻發之

隋書八十五卷

唐秘書監魏徵顏師古等撰其十志高宗時始成上總梁陳齊周之事俗號五代志

唐書二百卷

五代晉宰相涿郡劉昫等撰

新唐書二百二十五卷

案曾公亮進新唐書表及文獻通考鄭樵通志所著卷並與此

同惟宋史藝文志作二百五十五卷於李繪補注者仍作二百二十五卷其互異所由不可攷

翰林學士廬陵歐陽修永叔端明殿學士安陸宋祁

子京撰初慶歷中詔王堯臣張方平等刊修久而未

就至和初乃命修為紀志祁為列傳范鎮王疇宋敏

求呂夏卿劉義叟同編修嘉祐五年上之凡廢傳六

十一增傳三百三十一志三表四故其進書上表曰
其事則增於前其文則省於舊第賞增秩訓詞劉敞
原父所作最為古雅曰古之為國者法後王為其近
於已制度文物可觀故也唐有天下且三百年明君
賢臣相與經營扶持之其盛德顯功美政善謀固已
多矣而史官非其人記述失序使興壞成敗之迹晦
而不章朕甚恨之肆擇廷臣筆削舊書勒成一家具
官歐陽修宋祁創立統紀裁成大體范鎮王疇宋敏

求等網羅遺逸厥協異同凡十有七年大典乃立閱
富精覈度越諸子矣校讎有功朕將據古鑑今以立
時治為朕得法其勞不可忘也皆增秩一等布其書
於天下使學者咸觀焉舊例修書止著官高一人名
銜歐公曰宋公於我為前輩且於此書用力久且深
何可沒也遂於紀傳各著之宋公感其退遜今案舊
史成於五代文氣卑陋之時紀次無法詳略失中論
贊多用儷語固不足傳世而新書不出一手亦未得

為全善本紀用春秋例削去詔令雖太略猶不失簡
古至列傳用字多奇澁殆類虬戶銑谿體識者病之
歐公嘗卧聽藩鎮傳序曰使筆力皆如此亦未易及
也然其序全用杜牧罪言實無宋公一語然則歐公
殆不滿於宋名銜之著固惡夫爭名抑亦以自表異
耶溫公通鑑多据舊史而唐庚子西直謂新唐書敢
亂道而不好雖過甚亦不為亡謂也劉元城亦謂事
增文省正新書之失處云

文簡云進唐書表自言其文減於前其事多於舊此正其所為不逮遷固者顧以自銜何哉論語記夫子與弟子問答率不過數語而季氏將伐顓臾記所詰對甚詳不如是不足以見體要各造其極也今唐史務為省文而拾取小說私記則皆附著無棄其有官品尊崇而不預治亂又無善惡可垂鑑戒者悉聚徒繁無補殆與古作者不侔始唐史置局時其同僚約日著舊史所無者三事則固立於不善矣弊必至於

此然其名臣闕國治亂者如裴度陸贄魏徵傳悉致
其詳則其有補亦不可掩

隨齋
批注

五代史一百五十卷

宰相薛居正子平撰開寶中盧多遜扈蒙張澹李昉
等所修居正蓋監修官也

新五代史七十四卷

歐陽修撰其為說曰昔孔子作春秋因亂世而立法
余為本紀以治法而正亂君發論必以嗚呼曰此亂

世之書也諸臣止事一朝曰某臣傳其更事歷代者
曰雜傳尤足以爲世訓然不爲韓瞪眼立傳識者有
以見作史之難案韓通之死太祖猶未踐極也其當
在周臣傳明矣惟王皞唐餘錄史以入忠義傳云

三朝國史一百五十卷

景德四年詔王欽若陳堯佐趙安仁晁迥楊億等修
太祖太宗正史王旦監修祥符九年書成凡爲紀六
志五十五列傳五十九目錄一共一百一十卷天聖

四年呂夷簡夏竦陳堯佐修真宗正史王曾提舉八年上之增紀為十志為六十傳為八十

兩朝國史一百二十卷

熙寧十年詔修仁宗英宗正史宋敏求蘇頌王存黃履等編修吳克提舉元豐五年王珪李清臣等上之

四朝國史三百五十卷

案文獻通攷作二百五十卷

紹興二十八年置修國史院修一朝正史三十一年提舉陳康伯奏紀成乞選日進呈至乾道二年閏九

月始與太上聖政同上淳熙五年同修史李燾言修四朝正史開院已十七年乞責以近限七年十月修史王希呂奏志成十二月進呈至十三年修史洪邁奏昨得旨限一年內修成列傳今已成書十一月與會要同進蓋首尾三十年所歷史官不知其幾矣

史記音義二十卷

唐崇賢館學士劉伯莊撰貞觀初奉勅講授采鄆誕生徐廣及隋柳顧言音義為此書

案唐書藝文志有劉伯莊撰史記地

名二十卷又史記音義二十卷袁凱謂
或沿鄴誕生徐廣舊名而並稱之誤也

史記索隱三十卷

唐宏文館學士河內司馬貞撰採摭異聞釋文演註
末二卷為述贊為三皇本紀世號小司馬史記

附索隱史記一百三十卷

淳熙中廣漢張材介仲刊於桐川郡齋削去褚少孫
所續而附以司馬貞索隱其後江陰耿秉直之復取
所削者別刊之

史記正義三十卷

案唐宋藝文志俱作三十卷此本作二十卷疑誤今改正

唐諸王侍讀張守節撰開元二十四年作序

三劉漢書標注六卷

侍讀學士清江劉敞原父中書舍人劉攽貢父端明

殿學士劉奉世仲馮撰奉世敞之子也又本題公非

先生刊誤其實一書

案宋史藝文志三劉漢書標注六卷劉攽漢書刊誤四卷宋代

著漢書刊誤者四家張泌余靖劉敞其一亡其名氏劉氏之書因宋仁宗讀後漢書見墾田皆作懇字於是使侍中傳詔中書刊正之敞為學官遂刊其誤劉氏書凡四卷趙希弁讀書附志止云東西漢各一卷

吳仁傑兩漢刊誤補遺補劉氏之遺也此書云其實一書未知何據公非貢父自號也

漢書自顏監之後舉世宗之未有異其說者至劉氏兄弟始為此書多所辨正發明

唐書直筆新例四卷

修書官溫陵呂夏卿撰紀傳志各一卷摘舊史繁闕又為新例須知附於後略舉名數如目錄之類

唐書音訓四卷

宣義郎汝上竇革叔野撰

唐書糾繆二十卷

朝請大夫知蜀州成都吳縝廷珍撰其父師孟顯於
熙豐序言修書之時其失有八而糾摘其繆誤為二

十門侍讀胡宗愈言於朝紹聖元年上之世傳縝父

以不得預修書故為此

案揮塵錄嘉祐中宋景文歐陽文忠諸公重修唐書時吳

縝初登第因范景仁而請於文忠願預官屬之末文忠以年少輕佻拒之縝恚甚而去迨新書成乃指摘瑕疵為糾繆一書此云世傳其父不能預修故為此未知何據

五代史纂誤五卷

案宋史藝文志作三卷

雜錄一卷

吳縝撰宇文嘗中守吳興以郡庠有二史板遂取二書刻之後皆取入國子監初郡人思溪王氏刻藏經有餘板以刊二史寘郡庠中興監書多闕遂取其板以往今監本是也

唐書列傳辨證二十卷

端明殿學士玉山汪應辰聖錫撰專攻列傳不及紀志以元祐名賢謂列傳記事毀於鐫削暗於藻繪故隨事辨證之

西漢決疑五卷

國子司業宛丘王逵致君撰

案文獻通考作王逵

一曰失實二

曰引古三曰異言四曰雜證五曰注釋

西漢刊誤補遺十七卷

案宋史藝文志作十卷

國子博士吳仁傑斗南撰補三劉之遺也

別史類

南史八十卷北史八十卷

唐崇賢館學士鄴李延壽撰初延壽父大師多識舊

事常以宋齊梁陳魏齊周隋天下分隔南謂非為索虜北謂南為島夷詳略訾美失傳思所以改正刊究未成而沒延壽追終先志凡八代合二書為百八十八篇其書頗有條理刪落釀辭過本書遠甚

高氏小史一百三十卷

案唐書藝文志文獻通攷俱作一百二十卷

唐殿中丞高峻撰本書六十卷其子迴分為一百二十蓋鈔節歷代史也司馬溫公嘗稱其書使學者觀之今案國史志凡一百九卷目錄一卷中興書目一

百二十卷止於文宗今本多十卷直至唐末峻元和中人則其書當止於德順之間迴之所序但云分六十卷為百二十取其便易而已初未嘗有所增加也其止於文宗及唐末者殆皆後人傳益之非高氏本書此書舊有杭本今本用厚紙裝襍夾面寫多錯誤俟求杭本校之

唐餘錄史三十卷

案文獻通攷作六十卷

直集賢院益都王皞子融撰寶元二年上是時惟有

薛居正五代舊史歐陽修書未出此書有紀有志有傳又博採諸家小說倣裴松之三國志注附其下方蓋五代別史也其書列韓通於忠義傳且表出本朝褒贈之典新舊史皆不及此館閣書目以入雜傳類非是皐曾之弟後以元昊反乞以字為名仕至集賢院學士

古史六十卷

門下侍郎眉山蘇轍子由撰因馬遷之舊上觀詩書

下攷春秋及秦漢雜錄為七本紀十六世家三十七列傳蓋漢世古文經未出戰國諸子各自著書或增損古事以自信其說遷一切信之甚者或采世俗相傳之語以易古文舊說故為此史以正之然其稱遷淺近而不學疎略而多信遷誠有可議者而以為不學淺近則過矣

東都事略一百五十卷

承議郎知龍州眉山王偁季平撰其書紀傳附錄畧

具體但無志耳附錄用五代史例也淳熙中上其書
得直秘閣其所紀太簡略未得為全善

新唐書略三十五卷

呂祖謙授徒患新史難閱摘要抹出而門人鈔之蓋
節本之有倫理者也

編年類

漢紀三十卷

漢侍中汝南荀悅仲豫撰獻帝好典籍常以班固漢

書文繁難省乃令悅依左氏傳體以為漢紀詔尚書
給筆劄辭約事詳論辨多美其自序曰立典有五志
焉曰達道義章法式通古今著功勲表賢能

後漢紀三十卷

晉東陽太守陽夏袁宏彥伯撰以後漢書煩穢雜亂
撰集為此記

晉春秋略二十卷

唐秘書省正字杜延業撰自王隱而下諸書及諸僧

偽傳記皆所詳究而以蕭方等三十國春秋刪緝為此書館閣書目作杜光業案唐志亦曰延業攷新舊史他無所見未詳何時人

元經薛氏傳十五卷

稱王通撰薛收傳阮逸補并注案河汾王氏諸書自中說之外皆唐藝文志所無其傳出阮逸或云皆逸偽作也今攷唐神堯諱淵其祖景皇諱虎故晉書戴淵石虎皆以字行薛收唐人於傳稱戴若思石季龍

金史卷四
宜也元經作於隋世而太興四年亦書曰若思何哉
意逸之心勞日拙自不能掩耶此書始得於莆田纔
三卷止晉成帝後從石林葉氏得全本錄成之

唐歷四十卷

唐集賢學士河東柳芳仲敷撰芳所緝國史叙天寶
後事不倫及謫黔中會高力士同貶因從之質開元
天寶禁中事本末史已上送不可追刊乃用編年法
作此書起隋義寧元年迄大歷十三年

續唐歷二十二卷

唐監修國史崔龜從元吉撰起大歷十三年春盡元和十五年以續柳芳之書也藝文志載韋澳蔣偕李荀張彥遠崔瑄等撰實大中時

大唐統紀四十卷

唐江南西道觀察判官陳嶽撰用荀彖體起武德盡長慶為一百卷今止武后如意非全書也

通歷十五卷

唐泉州別駕扶風馬總會元撰書本十卷止於隋代
今書直至五代增五卷者後人所續也晁公武志續
通歷十卷孫光憲撰太祖朝嘗詔毀其書

唐年補錄六十五卷

後晉起居郎史館修撰獲鹿賈緯撰以武宗後無實
錄故為此書終唐末其實補實錄之缺也雖論次多
缺誤而事迹麤存亦有補於史氏

五代通錄六十五卷

宰相昭文館大學士大名范質文素撰亦以實錄繁
冗節畧而成此書

帝王照畧一卷

案文獻通攷
照畧作鏡畧

唐洺州刺史劉軻撰偽蜀馮鑑注并續唐祚以後唐
志及館閣書目有劉軻帝王歷數歌一卷疑即此書
也

紀年通譜十二卷

丞相宋庠公序撰自漢文後元有年號之後以甲子

欽定四庫全書

通志卷四

貫之曰正曰閏曰偽曰賊曰蠻夷以正為主而附列其左號統元為十卷其二卷曰類元因文之同各以彙別慶歷中表上之宣義郎畢仲荀續補一卷止元符三年

資治通鑑二百九十四卷目錄三十卷攷異三十卷丞相溫公河內司馬光君實撰初光嘗約戰國至秦二世如左氏體為志八卷以進英宗悅之遂命論次歷代君臣事迹起周威烈迄乎五代就秘閣置局神

宗御製序賜名資治通鑑及補外聽以書局自隨元
豐七年書成上曰賢於荀悅漢紀遠矣目錄倣史記
年表年經國緯用劉義叟長歷氣朔而撮新書精要
散於其中攷異參諸家異同正其謬誤而歸於一總
三百五十四卷

通鑑舉要歷八十卷

司馬光撰通鑑既成尚患本書浩大難領畧而目錄
無首尾晚著是書以絕二累其藁在晁說之以道家

紹興初謝克家任伯得而上之

累代歷年二卷

司馬光撰即所謂歷年圖也治平初所進自威烈王至顯德本為圖五卷歷代皆有論今本陳輝晦叔刻於章貢為方策以便觀覽而自漢高帝始

百官公卿表十五卷

司馬光撰其序曰朝廷所以鼓舞羣倫緝熙庶績者曰官曰差遣曰職而已所謂官者乃古之爵也所謂

差遣者古之官也所謂職者古之加官也自建隆以來文官知雜御史以上武官閤門使以上內臣押班以上遷轉黜免存其實以先後相次為表本入職官類以稽古錄序所謂建隆接乎熙寧臣又著之於百官表即謂此書蓋與通鑑相為表裏故著之於此案晁氏讀書志有一百四十二卷未詳

稽古錄二十卷

司馬光撰其表云由三晉開國迄於顯德之末造臣

既具之於歷年圖自六合為宋接於熙寧之元臣又著之於百官表乃威烈丁丑而上伏羲書契以來悉從論纂皆有依憑蓋元祐初所上也此書始刻於越其後再刻於潭越本歷年圖諸論聚見第十六卷蓋因圖之舊也潭本諸論各繫於國亡之時故第十六卷惟存總論

通鑑釋文二十卷

案宋史藝文志作六卷

司諫司馬康公休撰溫公之子也

通鑑釋文三十卷

左宣義郎眉山史炤見可撰馮時行為之序今攷之
公休之書大畧同而加詳焉蓋因其舊而附益之者
也

通鑑前例一卷修書帖一卷三十六條四圖共一卷

司馬光記集修書凡例諸帖則與書局官屬劉恕范
祖禹往來書簡也其曾孫侍郎伋李思哀為一編又
以前例分為三十六條而攷其離合稽其授受推其

甲子括其卷帙列為四圖

通鑑問疑一卷

高安劉義仲壯興纂集其父道原與溫公往復相難者亦附修書帖後

通鑑外紀十卷目錄三卷

秘書丞高安劉恕道原撰司馬公修歷代君臣事迹辟恕為屬嘗謂史記不及庖犧神農今歷代書不及威烈之前欲為前紀而本朝為後紀將俟書成請於

公會道原病發絕意後紀迺改前紀為外紀云通鑑
書成恕已亡范淳父奏恕於此書用力最多援黃鑑
梅堯臣例官其子且以書賜其家道原父渙凝之家
廬山歐陽公所為賦廬山高也

疑年譜一卷年略譜一卷雜年號附

劉恕撰謂春秋起周平魯隱史記本紀自軒轅列傳
首伯夷年表起共和共和至魯隱其間七十一年即
與春秋相接矣先儒叙庖犧女媧下逮三代享國之

歲衆說不同懼後人以疑事為信書穿鑿滋甚故周厲王以前三千五百一十九年為疑年譜而共和以下至元祐壬申一千九百一十八年為年略譜大略不取正閏之說而從實紀之四夷及寇賊僭紀名號附之於末

唐史論斷三卷

天章閣待制陽翟孫甫之翰撰甫以唐書煩冗遺略多失體法乃修為唐史用編年體自康定元年逮嘉

祐元年成七十五卷為論九十二首甫沒朝廷取其書留禁中其從子察錄以遺溫公而世亦罕見聞蜀有刻本偶未得之今惟諸論存焉

編年通載十五卷

集賢院學士建安章衡子平撰編歷代帝系年號始自唐虞迄於聖宋治平四年總三千四百年熙寧七年以上之其族父橐質夫為之序衡嘉祐二年進士首選也

欽定四庫全書

唐鑑十二卷

案文獻通考作二十卷

翰林學士成都范祖禹淳父撰祖禹與修通鑑分主
唐史元祐初上此書攷其治亂興廢之由為三百六
篇

紹運圖一卷

諸葛深通甫撰元祐中人未詳爵里其書頗行於世
俗

歷代帝王年運詮要十卷

左朝請大夫朱繪撰紹興五年序未詳何所人

歷代紀年十卷

濟北晁公邁伯咎撰詠之子也嘗為提舉常平使者其自為序當紹興七年

讀史管見三十卷

禮部侍郎胡寅明仲撰以通鑑事備而義少故為此書議論宏偉嚴正間有感於時事其於熙豐以來接於紹興權姦之禍尤拳拳寓意焉晦翁綱目亦多取

欽定四庫全書

自唐書錄解題

三

之案朱子謂讀史管見乃致堂滴嶺表所作當時無一冊文字隨行只是記憶而議論儘有好處與此所云宏偉嚴正有感時事大指相同要之其書不外通鑑立義文獻通攷及宋史藝文志視解題分類較多故不入編年而入史評史鈔

皇王大紀八十卷

胡宏撰述三皇五帝至周赧王前二卷自盤古至帝嚳年不可攷信姑載其事而已自堯以後用皇極經世歷起甲辰始著年紀博採經傳時有論說自成一
家之言然或取莊周寓言以為實及叙遠古之初終

於無徵不信云爾

案趙希弁讀書附志云五峯先生所述皇帝王霸之事自堯以上六

闕逢無紀堯之初載迄於赧王乙巳二千有三十年貫通經典採摭史傳又因事而為之論所以述去取之原釋疑似之感者至矣朱彝尊作皇王大紀跋謂譙周蘇轍撰古史胡衛撰通史緣起羅泌撰路史不盡出于雅馴惟此書擇之精而語之詳云

經世紀年二卷

侍講廣漢張栻敬夫撰用皇極經世譜編有所發明則著之其言邵氏以數推知去外丙仲壬之年乃合於尚書成湯既沒太甲元年之說今按孔氏正義正

謂劉歆班固不見古文謬從史記而張衡通載乃云以紀年推之外丙仲壬合於歲次尚書殘缺而正義之說誤蓋三代而上帝王歷年遠而難攷類如此劉道原所謂疑年者也然孟子亦有明文不得云史記謬

通鑑論篤三卷

侍講廣漢張栻敬夫撰取通鑑中言論之精確者表而出之多或全篇少至一二語去取甚嚴可以見前

輩讀書眼力之高

通鑑紀事本末四十二卷

工部侍郎袁樞機仲撰樞自太學官分教嚴陵為此
書楊誠齋為之序

通鑑綱目五十九卷

侍講新安朱熹元晦撰始司馬公通鑑有目錄舉要
其後胡給事安國康侯又修為舉要補遺朱晦翁因
別為義例表歲以首年因年以著統大書以提要而

分注以備言自為之序乾道壬辰也大書者為綱分
注者為目綱如經目如傳此書嘗刻於溫陵別其綱
謂之提要今板在監中廬陵所刊則綱目並列不復
別也

國紀五十八卷

吏部侍郎睢陽徐度敦立撰度丞相處仁擇之之子
也其書詳略頗得中而不大行於世鄞學有魏邱舊
書傳得之

續通鑑長編一百六十八卷

禮部侍郎眉山李燾仁父撰長編云者司馬公之為通鑑也先命其屬為叢目既成乃修長編然後刪之以為成書唐長編六百卷今通鑑惟八十卷爾燾所上表自言未可謂之通鑑止可謂之長編故其書雖繁蕪而不嫌也其卷數雖如此而冊數至餘三百蓋逐卷又自分子卷或至十餘

續通鑑長編舉要六十八卷

李燾撰大畧皆溫公舊規也

九朝通略一百六十八卷

起居郎建安熊克子復撰

中興小歷四十一卷

熊克撰克之為書往往疏略多牴牾不稱良史

中興遺史六十卷

從義郎趙銍之撰慶元中上進其書大抵記軍中事
為詳而朝政則甚畧意必當時遊士往來邊陲出入

幕府者之所為及觀其記張浚攻濠州一段自稱姓名曰開封張鑑然則此書鑑為之而姓之竊以為已有也或曰鑑即姓之婦翁未知信否

丁未錄二百卷

左修職郎昭武李丙撰自治平丁未王安石初召用迄於靖康童貫之誅故以丁未名之每事皆全載制

詔章疏甚詳

原註靖康亦丁未也

思陵大事記三十六卷阜陵大事記二卷

李燾撰

建炎以來繫年要錄二百卷

工部侍郎陵陽李心傳微之撰蓋與李巽巖長編相續亦嘗自隆興後相繼為之會蜀亂散失不可復得

大事記十二卷解題十二卷通釋一卷

案宋史藝文志作二十七卷

著作郎東萊呂祖謙伯恭撰自敬王三十九年以下采左氏傳歷代史皇極經世通鑑稽古錄輯而廣之雖上接獲麟而書法則視太史公所錄不盡用策書

凡例解題者略具本末或附以已意多所發明通釋者經典綱要孔孟格言以及歷代名儒大議論初意欲起春秋接於五代僅及漢武征和三年而止東萊年方強仕而得末疾平生論著大抵經始而未及成如讀詩記書說是已是書之作當淳熙七年又二年而沒使天假之年所傳於世者寧止是哉

建隆編一卷

陳傅良撰蓋長編太祖一朝節畧也隨事攷訂併及

累朝始末慶元初在經筵所上

讀書譜一卷

陳傅良撰自伏羲迄春秋終以易書詩春秋諸經攷
世代而附著之共和而下始有年數

紀年統紀論一卷

永嘉朱黼文昭撰黼從陳止齋學嘗著記年備遺起
陶唐終顯德為百卷蓋亦本通鑑稽古錄而擷其中
論正統者為統紀論是編葉水心序之

皇朝編年舉要三十卷備要二十卷

案文獻通考備要亦作三十卷 中

興編年舉要十四卷備要十四卷

太學生莆田陳均平甫撰均丞相俊卿之從孫端平初有言於朝者下福州取其書由是得初品官大抵依倣朱氏通鑑綱目舉要者綱也備要者目也然去取無法詳畧失中未為善書

續百官公卿表十卷質疑十卷

兵部尚書永嘉蔡幼學行之撰續溫公舊書起熙寧

至靖康質疑者攷異也

續稽古錄一卷

秘書丞歷陽龔頤正養正撰以續司馬光前錄而序述繁釀其記紹熙甲寅事歸功於韓侂冑頤正本名敦頤避崇陵諱改焉嘗撰元祐黨籍譜傳得官韓氏用事時賜出身入館非端士也此書正以右韓也

歷代帝王纂要譜括二卷

餘姚孫應符仲潛撰蓋紹運圖之詳者也

起居注類

唐志起居注類實錄詔令皆附焉今惟存穆天子傳及唐創業起居注二種餘皆不存故用中興館閣書目例與實錄共為一類而別出詔令

穆天子傳六卷

晉武帝時汲冢所得書其體制與起居注正同郭璞為之注起居注者

案原本脫此四字今據文獻通攷補入

自漢明德馬

皇后始漢魏以來因之

唐創業起居注五卷

案唐書藝文志作三卷

唐工部尚書晉陽溫大雅彥宏撰所載自起義至受禪凡三百五十七日其述神堯不受九錫反復之語甚詳愚嘗書其後曰新史稱除隋之亂比迹湯武湯武未易比也唐之受命正與漢高帝等爾其不受九錫足以掃除魏晉以來欺天罔人之態而猶不免曰受隋禪者乃以尊立代王之故曾不若以子嬰屬吏之為明白洞達也

唐高祖實錄二十卷

唐給事中河東敬播撰案志稱房玄齡監修許敬宗刪改今本首題監修國史許敬宗奉勅定而第十一卷題司空房玄齡奉勅撰不詳其故

唐太宗實錄四十卷

案藝文志有今上實錄二十卷敬播等撰房玄齡監修又有長孫無忌太宗實錄四十卷今本惟題中書令許敬宗奉勅撰蓋敬宗當高宗時用事以私意竄

改國史中興書目言之詳矣但今本既云許敬宗撰而以為恐止是玄齡無忌所進則不可攷也

唐高宗後修實錄十九卷

唐左散騎常侍彭城劉知幾子元恒王傅汴州吳兢撰案志令狐德棻撰止乾封知幾續成之故號後修書本三十卷今闕十一卷

唐則天實錄二十卷

吳兢撰案志魏元忠等撰劉知幾吳兢刪正今惟題

兢撰武氏罪大惡極固不應復入唐廟而題主猶有
聖帝之稱至開元中禮官有言乃去之武氏不應有
實錄猶正史之不應有本紀皆沿襲史漢呂后例惟
沈既濟之論為正而范氏唐鑑用之唐鑑中宗嗣聖
元年書至二十一年案神龍元年黜武后光宅至長
安並不用

唐中宗實錄二十卷

吳兢撰

唐睿宗實錄十卷

劉知幾撰志有二錄五卷者為吳兢今此十卷當是知幾也館閣書目亦別有五卷者

唐玄宗實錄一百卷

題元載撰蓋左拾遺令狐峴所為而載以宰相監修也史稱事多漏略拙於取棄不稱良史峴德棻五世孫也

唐肅宗實錄三十卷

案文獻通攷作二十卷

亦元載監修不見史官姓名

唐代宗實錄四十卷

令狐峘撰尤為漏略不立房琯傳不載顏真卿事跡

唐建中實錄十卷

唐史館修撰吳郡沈既濟撰其書止於建中二年十月既濟罷史官之日

唐德宗實錄五十卷

稱裴垍撰亦監修宰相也案志蔣乂樊紳林寶韋處

厚獨孤郁撰埒字宏中河東人

唐順宗實錄五卷

唐史館修撰韓愈撰見愈外集案志稱韓愈沈傳師
宇文籍撰李吉父監修新史謂議者闕然不息卒竄
定無完篇以閹官惡其書禁中事切直故也

唐憲宗實錄四十卷

題路隋撰隋自長慶中與韋處厚同修撰歷年久而
未成至文宗太和中隋為監修迺上之案志稱沈傳

師鄭瀚字文籍蔣繫李漢陳夷行蘇景喬

案唐書藝文志注作

蘇景

允撰蓋前後史官也又稱杜元穎韋處厚路隋監

修亦前後宰相也

唐穆宗實錄二十卷

亦路隋監修史官則蘇景喬王彥威楊漢公蘇滌裴
休也

唐敬宗實錄十卷

監修李讓夷史官陳商鄭亞同修

唐文宗實錄四十卷

監修魏謩史官盧耽蔣偕王渢盧告牛叢也

唐武宗實錄三十卷

監修韋保衡

案原本脫此句今據唐書藝文志校補

宣宗實錄三十卷

懿宗實錄二十五卷

僖宗實錄三十卷

昭宗實錄三十卷

哀帝實錄八卷

案唐志惟有武宗實錄三十卷其後皆未嘗修纂更
五代武錄亦不存邯鄲書目惟存一卷而已五錄者
龍圖閣直學士常山宋敏求次道追述為書案兩朝
史志初為一百卷其後增益為一百四十八卷今案
懿錄三十五卷止有二十五卷而始終皆備非闕也
實一百四十三卷館閣書目又言闕第九一卷今本
亦不闕云

後唐莊宗實錄三十卷

監修趙鳳史官張昭遠撰天成四年上

後唐明宗實錄三十卷

監修姚顗史官張昭遠等撰清泰三年上

後唐廢帝實錄十七卷

張昭

案東都事略本傳舊名昭遠避漢祖諱止稱昭

尹拙劉溫叟撰案昭本

傳撰梁均王郢王後唐愍帝廢帝漢隱帝實錄惟梁

二王年紀浸遠事皆遺失遂不修餘三帝實錄皆藏

史閣周世宗時也蓋昭本撰周祖實錄以其歷試之迹多在漢隱帝時故請先修隱錄因併及前代云

晉高祖實錄三十卷

晉少帝實錄二十卷

監修實正固史官賈緯王仲實儼等撰周廣順元年上正固字體仁同州人相漢至周罷歸洛陽國初卒

漢高祖實錄十七卷

監修蘇逢吉史官賈緯等撰乾祐二年上書本二十

卷今缺末三卷中興書目作十卷

漢隱帝實錄十五卷

張昭等撰事已見前

周太祖實錄三十卷

張昭等撰顯德五年上昭即昭遠字潛夫濮上人避
漢祖諱止稱昭逮事本朝為吏部尚書開寶四年卒

案宋史本傳
開寶五年卒

周世宗實錄四十卷

監修官晉陽王溥齊物修撰范陽扈蒙日用撰

太祖實錄五十卷

監修國史肥鄉李沆太初史官集賢院學士河南錢
若水淡成等重修初溥化中命李至張洎等修太祖
史未成及咸平元年太祖實錄成書以太祖朝事多
漏略故再命若水修撰二年書成上之卷首有沆進
書表叙前錄之失及新書刊修條目甚詳同修者直
館饒陽李宗諤昌武東平梁灝太素直集賢院河南

趙安仁樂道李燾云世傳太祖自陳橋推戴馬上約束諸將本太祖聖意前錄無太宗叩馬之語乃後錄所增也前錄既不傳今不可攷矣李燾長編具載而云舊錄所無今從新錄然則燾亦嘗見舊錄也耶近聞士大夫家亦多有之求之未獲也

太宗實錄八十卷

錢若水等以至道三年十一月受命咸平元年八月上之九月而畢人難其速同修撰者給事中濟陰柴

成務實臣秘閣校理丹陽吳淑正儀直集賢院建安
楊億大年案億傳書凡八十篇而億獨草五十六卷
眞宗實錄一百五十卷

學士承旨肥鄉李維仲方學士臨川晏殊同叔撰乾
興元年受詔天聖二年監修新喻王欽若定國上之
同修者侍講博平孫奭宗古知制誥趙郡宋綬公垂
度支副使閬中陳堯佐舜元校理真定王舉正伯中
校勘河南李淑獻臣

仁宗實錄二百卷

學士華陽王珪禹玉范鎮景仁知制誥常山宋敏求
次道撰嘉祐八年奉詔歷治平至熙寧二年七月書
成宰臣韓琦提舉

英宗實錄三十卷

學士壽春呂公著晦叔長社韓維持國知制誥浦城
吳充冲卿撰熙寧元年正月奉詔二年七月宰臣提
舉曾公亮上之

英宗實錄熙寧元年曾宣靖提舉王荊公時已入翰林請自為之兼實錄修撰不置官屬成書三十卷出於一手東坡先生嘗語劉壯與義仲云此書詞簡而事備文古而意明為國朝諸史之冠

揮麈第三錄

晁氏讀

書志云熙寧元年正月詔曾公亮提舉呂公著韓維修撰孫覺曾鞏檢討三月又以錢藻檢討四月又以王安石吳充為修撰二年七月書成上之

隨齋批注

神宗實錄朱墨本二百卷

案宋史藝文志作三百卷

元祐中兵部侍郎青社趙彥若元攷著作郎成都范
祖禹淳甫豫章黃庭堅魯直撰紹聖中中書舍人蒲
田蔡卞元度長樂林希子中等重修其朱書繫新修
黃字繫刪去墨字繫舊文其增改刪易處則又有籤
貼前史官由是得罪卞王安石之壻大抵以安石曰
錄為主陳瓘所謂尊私史而壓宗廟者也

神宗實錄攷異二百卷

監修解梁趙鼎元鎮史官成都范沖元長等撰建炎

初有詔重修紹興六年先進呈五十卷六年正月書成攷異者備朱墨黃三書而明著其去取之意也闕百六十一至百七十一卷初蔡卞既改舊錄每一卷成納之禁中蓋將盡泯其迹而使新錄獨行謂朱墨本者世不可得而見也及梁師成用事自謂蘇氏遺體頗招延元祐諸家子孫若范溫秦湛之流師成在禁中見其書為諸人道之諸人幸其書之出因曰此不可不錄也師成如其言及敗沒入有得其書者攜

以渡江遂傳於世嗚呼此可謂非天乎

哲宗實錄一百五十卷

監修趙鼎史官范冲等重修紹興四年三月思陵嘗謂宰臣朱勝非等曰神宗哲宗史錄事多失實當別修定范祖禹之子冲已有詔命可趣來令兼史職冲至以宗正少卿兼直史館辭不許上謂勝非等曰此事朕何敢私頃歲昭慈誕辰宮中置酒從容語及前朝事曰吾逮事宣仁求之古今母后之賢未見其比

姦臣私憤誣謗雖嘗下詔辨明而史錄未經刪改豈足貽信後世吾意在天之靈不無望也朕每念及此惕然于懷欲降一語具載昭慈遺旨庶使中外知朕修史之本意於是以聖語繫之哲錄之末

徽宗實錄一百五十卷

監修宰相湯思退等上自紹興七年詔修十一年先成六十卷至二十八年書成修撰官歷年既久前後非一人至乾道五年秘書少監李燾請重修淳熙四

年成二百卷攷異百五十卷目錄二十五卷今百五十卷者前本也

欽宗實錄四十卷

乾道四年修撰洪邁等進

高宗實錄五百卷

慶元三年修撰濟源傅伯壽景仁撰初進二百八十卷止紹興十六年嘉泰二年修撰建安袁說友起巖等又進二百二十卷止三十二年

孝宗實錄五百卷

嘉泰二年修撰傅伯壽等撰進中興以來兩朝五十
餘載事迹置院既久不以時成涉筆之臣乍遷忽徙
不可殫紀及有詔趣進則匆遽鈔錄甚者一委吏手
卷帙猥多而紀載無法疎畧牴牾不復可稽據故二
錄比之前世最為缺典觀者為之太息

直齋書錄解題卷四

欽定四庫全書

史部

直齋書錄解題卷五

詳校官侍講學士臣法式善

編修臣程嘉謨覆勘

覆校官庶子臣鄒奕孝

校對官中書臣孫球

謄錄監生臣馮光煦

欽定四庫全書

直齋書錄解題卷五

宋 陳振孫 撰

詔令類

西漢詔令十二卷

吳郡林處德祖編采括志傳參之本紀以示信安程
俱致道俱以世次先後各為一卷差比歲月纂而成
書且為之序處嘗試中詞學為開封府掾尹以佞幸
進有所不樂引疾納祿去遂終於家

東漢詔令十一卷

宗正寺主簿鄧樓昉暘叔編大抵用林氏舊體自為之序帝王之制具在百篇後世不可及矣兩漢猶為近古愚未冠時無書可觀雖二史亦從人借嘗於班書志傳錄出諸詔與紀中相附以便覽閱既仕於越乃得見林氏書而樓氏書近出其為好古博雅斯以勤矣惟平獻二朝莽操用事如錫莽及廢伏后之類皆當削去莽時尤多也

本朝大詔令二百四十卷

寶謨閣直學士

案原本誤作實錄閣
今據文獻通攷改正

豫章李大異伯

珍刻於建寧云紹興間宋宣獻家子孫所編纂也而
不著其名始自國初迄於宣政分門別類凡目至為
詳也

玉堂制草十卷

參政鉅野李邴漢老編承平以前制誥

中興玉堂制草六十四卷

同知樞密鄱陽洪遵景嚴編起建炎迄紹興末

中興續玉堂制草三十卷

丞相益文忠公東里周必大子充為學士院時編進
始嘗進言加上德壽尊號不以表而以議且稱嗣皇
帝為非是遂革之今書以尊號表為卷首而增附館
職策問於後起隆興迄淳熙改元自後未有續者

綸言集三十一卷

宇文粹中虛中兄弟所編集

中興綸言集二十八卷

左司郎中莆田鄭寅子敬編寅知樞密院僑之子端重博洽藏書數萬卷於本朝典故尤熟

偽史類

淝上英雄小錄二卷

信都鎬撰

案鄭樵通志作偽吳信都鎬撰

所錄楊行密將吏有勲名

者四十人其二十四人皆淝上餘諸道人又有僧道漁樵之屬十人錄其小事故名小錄

江淮異人錄二卷

吳淑撰所紀道流俠客術士之類凡二十五人

南唐烈祖開基誌十卷

南唐滁州刺史王顏撰起天祐乙丑止昇元癸卯合

三十九年

南唐烈祖實錄十三卷

南唐史館修撰高遠撰闕第八第十二卷遠又嘗為

吳錄二十卷而徐鉉鄭文寶皆云開寶中遠始緝昇

元以來事書未成而疾悉焚其草故事多遺落

江南錄十卷

給事中廣陵徐鉉鼎臣光祿卿池陽湯悅德川撰二人皆唐舊臣故太宗命之撰次悅即殷崇義避宣祖諱及太宗舊名并姓改焉

南唐近事二卷

工部郎江南鄭文寶撰序云三世四十年起天福己

酉終開寶乙亥

案宋太祖在位十七年首庚申盡丙子乙亥乃開寶八年原本作己亥誤

今改
正 然泛記雜事實小說傳記之類耳

江表志三卷

鄭文寶撰序言徐鉉湯悅所錄事多遺落無年可編
然前錄固為簡略而猶以年月紀事今此書亦止雜
記如事實之類爾近事稱太平興國二年丁丑今稱
庚戌者大中祥符三年也

南唐書三十卷

陽羨馬令撰序言其祖太博元康世家金陵多知南

唐故事未及撰次今纂先志而成之實崇寧乙酉其
書略備紀傳體而亦言徐鉉湯悅之疎略云

江南餘載二卷

不著姓名序言徐鉉始奉詔為江南錄其後王舉路
振陳彭年楊億皆有書大概六家皆不足以史稱而
龍衮為尤甚熙寧八年得鄭君所述於楚州其事迹
有六家所遺或小異者刪落是正取百九十五段以
類相從鄭君者莫知何人豈即文寶也耶

新修南唐書十五卷

實謨閣待制山陰陸游務觀撰采獲諸書頗有史瀆

前蜀紀事二卷

後蜀學士毛文錫平珪撰起廣明庚子盡天福甲子

凡二十五年文錫唐太僕卿龜範之子十四登進士

第八蜀仕建至判樞密院隨行入洛而卒

後蜀紀事二卷

直史館太常博士董淳撰惟記孟昶事

蜀檇杙十卷

殿中侍御史裏行新建張唐英次功撰唐英自號黃松子商英天覺之兄也

吳越備史九卷

吳越掌書記范垌巡官林禹撰按中興書目其初十二卷盡開寶三年後又增三卷至雍熙四年今書止石晉開運比初本尚闕三卷

吳越備史遺事五卷

全州觀察使錢儼撰叔之弟也其序言備史亦其所作託名林范而遺名墜迹殊聞異見闕漏未盡者復為是編時皇宋平南海之二年吳興西齋序蓋開寶五年也儼以三年代其兄偕刺湖州

閩中實錄十卷

周顯德中揚州永貞縣令蔣文憚記王審知父子及將吏儒士僧道事迹未亦畧及山川土物

閩王列傳一卷

秘書監晉江陳致雍撰二世七主通六十年

閩王事迹一卷

不知何人作卷末稱光啓二年至天聖九年一百三

十八年其所記頗詳

案閩亡於五代之末其世紀不得至天聖九年疑有誤

三楚新錄三卷

知桂州修仁縣周羽冲撰上卷為湖南馬殷中卷為

武陵周行逢下卷為荆南高季興

湖南故事十卷

不知作者記馬氏至周行逢事館閣書目作十三卷
蓋為列傳十三篇其實十卷也文辭鄙甚

五國故事二卷

不知作者記吳蜀閩漢諸國事

九國志五十一卷

右正言知制誥祁陽路振子發撰九國者謂吳唐二
蜀東南二漢閩楚吳越各為世家列傳凡四十九卷
末二卷為非楚書高季興事張唐英所補撰也

十國紀年四十卷

劉恕撰十國者即前九國之外益以荆南張唐英所謂北楚也

天下大定錄一卷

殿中丞通判桂州王舉撰景祐間人始高季興終劉繼元其所記疎畧獨江南稍詳書本十卷今但為一卷恐非全書也

陰山雜錄十六卷

不著名氏蒲田鄭氏書目云趙志忠撰志忠者遼中書舍人得罪於宗真挺身來歸歐公歸田錄云志忠本華人自幼陷敵為人明敏在敵中舉進士至顯官歸國能述敵中君臣世次山川風物甚詳今觀此書可概見矣

燕北雜錄五卷西征寨地圖附

思卿武珪記嘉祐六年宮苑使知雄州趙

案此處原本闕一字

進於朝珪自契丹逃歸事見國史傳

契丹錄一卷

即陰山雜錄之首卷也

匈奴須知一卷

歸明人田緯編次錄契丹地理官制

辨鵠錄一卷

不著名氏契丹譯語也凡八篇

邊廷須知一卷

左藏庫副使知安肅軍陳昉撰熙寧元年集賢校理

鄭穆為之序凡二十一條目

案文獻通攷作胡穆為之序

西夏須知一卷

內殿承制鄜延都監劉溫潤撰凡十五條目

金人亡遼錄二卷

燕山史愿撰或稱遼國遺事

松漠記聞二卷

徽猷閣直學士鄱陽洪皓光弼撰皓奉使留敵中錄所聞雜事

征蒙記一卷

金人明威將軍登州刺史李大諒撰建炎鉅寇之子
隨其父成降金者也所記家人跳梁自其金盛時已
不能制矣

金國志二卷

承奉郎張棣撰淳熙中歸明人記金國事頗詳

金國志一卷

不著名氏似節略張棣書其末又雜錄金國事宜及

海陵以後事

金國節要三卷

右從事郎充人張匯東鄉撰宣和中隨父官保州陷
金十五年至紹興十年歸朝

偽楚錄二卷

不著名氏

偽齊錄二卷

不著名氏

金人南遷錄一卷

稱偽著作郎張師顏撰頃初見此書疑非非人語其間有曉然傳會者或曰華岳所為也近扣之汴人張總管翼則云歲月皆牴牾不合益證其妄

雜史類

越絕書十六卷

無撰人名氏相傳以為子貢者非也其書雜記吳越事下及秦漢直至建武二十八年蓋戰國後人所為

而漢人又附益之耳越絕之義曰聖人發一隅辯士
宣其辭聖文越於彼辯士絕於此故題曰越絕雖則
云然而終未可曉也

越者國之氏也絕者絕也謂勾踐時也絕者絕也絕
惡反之於善越專其功故曰越絕並見本書 文簡
批編尾云越絕書謠不可讀如樂架之有啞鍾漁父

辭劍事見於此

隨齋
批注

戰國策三十卷

司馬遷史記所本劉向所校者也但無撰人名氏後漢高誘注自東周至中山十二國凡三十三篇

鮑氏校定戰國策十卷

尚書郎括蒼鮑彪注以西周正統所在易為卷首其注凡四易藁乃定

九州春秋九卷

晉司馬彪紹統撰漢末州部之亂司冀徐兗青荆揚梁幽凡盜賊僭叛皆紀之

華陽國志二十卷

案唐書藝文志華陽國志作十三卷

晉散騎常侍蜀郡常璩道將撰志巴蜀地理風俗人物及公孫述劉焉劉璋先後主以及李特等事迹未

卷為序志云肇自開闢終乎永和三年

原註劉璋乃焉之子

後魏國典三十卷

唐太常少卿元行沖撰行沖以系出拓跋乃撰魏典三十篇文約事詳學者尚之此本從莆田劉氏借錄卷帙多寡不同歲月首尾不具殆類鈔節似非全書

大業雜記十卷

唐著作郎杜寶撰紀煬帝一代事序言貞觀修史未盡實錄故為此書以彌縫闕漏

建康實錄二十卷

唐許嵩撰載吳晉宋齊梁陳六朝都建康者編年附傳大畧用實錄體

行在河洛記十卷

唐宰相尉氏劉仁軌正則撰記李密王世充事末二

欽定四庫全書

卷一百一十五

卷記隋都城宮殿池苑按唐志作行年記二十卷

河洛春秋二卷

唐揚州司功包諝撰記安史之亂

明皇雜錄一卷

唐校書郎鄭處誨撰雜記明皇時事大中九年序處

誨太和八年進士也

開天傳信記一卷

唐吏部員外郎鄭棨撰雜記開元天寶時事

安祿山事迹三卷

唐華陰尉姚汝龍撰

案唐書藝文志作姚汝能

開元昇平源一卷

唐史官吳兢撰叙姚崇十事

廬陵王傳一卷

唐彭王傅會稽徐浩季海撰叙狄仁傑五王事

奉天錄四卷

唐趙元一撰起建中四年涇原叛命終興元元年克

復神都

燕南記三卷

唐恒州司戶魏郡谷況撰專記成德一鎮事自建中

二年至太和七年起張孝忠

案唐書建中二年九月李納陷宋州李惟岳將

張孝忠以易定二州降原本作張志忠誤今改正

終王承元古語有燕南垂

趙北際今以其在燕之南故名然河北諸鎮連叛事

迹大畧具矣

建中河朔記六卷

唐李公佐撰序言與從弟正封讀國史至建中貞元之際序述河朔故事未甚詳備以舊聞於老僧智融及谷況燕南記所說略同參錯會要以補史闕

邠志三卷

案唐書藝文志作二卷

唐殿中侍御史凌準宗一撰邠軍即朔方軍也此本從盱江晁氏借錄其末題曰文忠修唐史求此書不獲今得於忠憲范公之孫伯高其中尚多誤當訪求正之紹興乙丑晁公鄮

涼國公平蔡錄一卷

唐山南東道掌書記鄭澥蘊士撰涼國公者李愬也

國史補三卷

唐學士李肇撰

大唐新語十三卷

唐江都縣主簿劉肅撰自武德迄大厯分類編纂凡

三十類元和丁亥歲序

太和野史三卷

不著名氏但稱大中戊辰陳郡袁濤序自鄭注而下
十七人本共為一軸濤分之為三卷

太和權兗記一卷

文與上同而不分卷豈其初本耶

野史甘露記二卷

不著名氏上卷記甘露之禍下卷叙諸臣本末

乙卯記一卷

唐布衣李潛用撰末又有吳郡李寔者述訓注本謀

附益之乙卯者太和九年也

兩朝獻替記三卷

唐宰相李德裕文饒撰叙文武兩朝相位奏對事迹

會昌伐叛記一卷

李德裕撰記平澤潞事

次柳氏舊聞一卷

李德裕撰記柳芳所聞於高力士者凡十七條上元中芳謫黔中力士徙巫州芳從力士問禁中事德裕

父吉甫從芳子冕聞之

四夷朝貢錄十卷

唐給事中渤海高少逸撰會昌中宰相李德裕以黠
憂斯朝貢莫知其國本原詔為此書凡二百一十國
本二十卷合之為十卷

東觀奏記三卷

唐右補闕裴延裕

案文獻通攷
作裴廷裕

膺餘撰記宣宗朝事

凡八十九條

貞陵遺事二卷續一卷

唐中書舍人令狐澄撰吏部侍郎柳玘續之澄所記
十七事玘所續十四事

咸通庚寅解圍錄一卷

唐成都少尹張雲景之撰言南詔圍城扞禦事

金鑒密記三卷

唐翰林學士承旨京兆韓偓致堯撰具述在翰苑時
事危疑艱險甚矣昭宗屢欲相之卒不果而貶竟終

於閩非不幸也不然與崔垂休輩駢肩就戮於朱溫之手矣

廣陵妖亂志三卷

唐晉陽鄭延晦撰

案唐書藝文志作郭廷誨撰

言高駢呂用之畢

師鐸等事

汴水滔天錄一卷

唐左拾遺王振撰言朱溫篡逆事

朱梁興創遺編二十卷

梁宰相馮翊敬翔子振撰自廣明巢賊之亂朱溫事迹迄於天祐弑逆大書特書不以為愧也其辭亦鄙俚

莊宗名禍記一卷

後唐中書舍人黃彬撰

三朝見聞錄八卷

不知作者起乾符戊戌至天祐末年及莊宗中興後唐河東事跡三朝者僖昭莊也其文直述多鄙俚

大唐補記三卷

南唐程匡柔撰

案馬令南唐書作程匡柔原本作臣柔誤今改正

序言懿宗

朝有焦璐者撰年代紀述神堯止宣宗匡柔襲撫三百年歷補足十九朝起咸通戊子止癸巳附璐書中乾符以後備存補記末有後論一篇文辭雖拙論議亦正

賈氏備史六卷

漢諫議大夫賈緯撰叙石晉禍亂每一事為一詩系

之

晉太康平吳記二卷

周兵部尚書張昭撰世宗將討江南昭采晉武平孫皓事迹為書上之

晉朝陷蕃記四卷

宰相大名范質文素撰據莆田鄭氏書目云爾本傳不載故館閣書目云不知作者未悉鄭氏何所據也五代補錄五卷

潯陽陶岳撰每代為一卷凡一百七條岳雍熙二年進士

五代史闕文一卷

翰林學士鉅野王禹偁元之撰

建隆遺事一卷

王禹偁撰其記陳橋驛前戒誓諸將事元出熙陵而序文云近取實錄入禁中親自筆削然則此書之作誠有謂也邵氏聞見錄亦嘗表而出之而或者亦辨

此書之偽是見於王明清揮塵錄者尤有據當考

原註

又名篋中記

案揮塵錄建隆遺事世稱王元之所

述其間率多誣謗之詞如稱趙普廬多遜受遺詔昌

陵尤為舛謬韓王以開寶六年八月免相至太平興

國六年九月始再秉衡鈞當太祖升遐時普政在外

何緣前一日與盧丞相同見於寢又稱太祖長子德

昭為南陽王初未嘗有此事且載秦王傳中云云安

有淳化三年而見三朝國史耶李燾亦識此書鄙悖

不類禹偁平日之文則此書之非禹偁作益足信也

甘陵伐叛記一卷

題文升撰不知何人末有論稱甘陵人蘇朔為余言

其大父慶歷中陷賊親見則初叛時事

原註則蓋王則也

按

中興書目有甘陵誅叛錄稱殿中丞王起撰起時為
文彥博幕客然則別自一書也

涑水記聞十卷

司馬光撰此書行於世久矣其間記呂文靖數事呂
氏子孫頗以為諱蓋嘗辨之以為非溫公全書而公
之曾孫侍郎伋季思遂從而實之上章乞毀板識者
以為譏

書壬戌事一卷

不知何人作其記永樂之事甚詳

逸史二十卷

丞相陽羨蔣芾子禮撰其曾祖魏公之奇頴叔所記
逸史殆數百冊兵火散失捃摭遺藁得六百六十事
為十九門淳熙改元書成為之序

林氏野史八卷

同知樞密院長樂林希子中撰希不得志於元祐起
從章惇甘心下遷西掖草諸賢謫詞者也而此書記

熙寧元豐以來事頗平直不類其所為或言此書作於元祐之前其後時事既變希亦隨之書藏不毀久而時事復變其孫懋於紹興中始序而行之耳

元和錄三卷

池州石埭縣尉維揚馬永錫明叟撰自元和三年牛李對策以至大中十三年令狐綯罷相唐朋黨本末具矣永錫嘗著唐職林實實錄等書崇觀政和間人也又有馬永卿大年者從劉元城游大觀三年進士

當是其羣從館閣書目以永錫為唐人大誤也

邵氏辨誣三卷

右奉直大夫河南邵伯溫子文撰專辨紹聖羣小誣謗宣仁事本末紹興中其子待制溥上之

邵氏聞見錄二十卷

邵伯溫撰多記國朝事又有後錄三十卷其子溥所作不專紀事在子錄小說類

康節兩孫溥博嘗見川本邵氏聞見後錄名博今作

溥未知直齋何所據恐博是蓋刊本不應誤也

隨齋批注

國史後補五卷

蔡條撰條京之愛子京末年事皆出條條兄攸既叛父亦與條不咸此書大畧為其父自解而滔天之惡終有不能隱蓋者其間所載宮闈禁密非臣庶所得知亦非臣庶所宜言既出條筆事遂傳世殆非人力也

北征紀實二卷

蔡條撰叙伐燕本末歸罪童貫蔡攸亦欲為京文飾然京之罪不可掩也

靖康要錄五卷

不著撰人名氏自欽廟潛邸迄靖康元年十二月事

朝野僉言二卷

不著名氏有序建炎元年八月繫年錄稱夏少曾未

詳何人

靖康傳信錄一卷

丞相李綱伯紀撰丁未二月

靖康奉使錄一卷

鄭望之撰

靖康拾遺錄一卷

何烈撰又名草史

孤臣泣血錄三卷拾遺一卷

丁特起撰

裔夷謀夏錄七卷

翰林學士新安汪藻彥章撰

陷燕記一卷

賈子莊撰記燕山初陷事子莊不知其名蔡靖客也

南歸錄一卷

直秘閣沈瑄撰亦記燕山事

靖康錄一卷

太學生朱邦基撰

金人犯闕記一卷

草茅方冠撰

汴都記一卷

無名氏

靖康遺錄一卷

太學生沈良撰

靖康野錄一卷

無名氏

避兵夜話一卷

吳興石茂良太初撰

靖康小史一卷

不著名氏其末稱名曰烈即何烈草史也

痛定錄一卷

不著名氏

悲喜記一卷

圍城中人作書與所親曰中美知府者具述喪亂本末自稱名曰暘皆不知何人也

嘗見一書名皇旋陷邊記中間載秘書少監趙賜與

姚太守書云云雖無中美之稱恐即此書也

隨齋批注

建炎中興記一卷

耿延禧撰

建炎中興日歷五卷

宰相新安汪伯彥建俊撰叙元帥開府至南都踐極

呂忠穆答客問一卷

宰相濟南呂頤浩元直撰

欽定四庫全書

直齋書錄解題卷五

三六

呂忠穆勤王記一卷

左宣教郎臧梓撰記建炎復辟事

渡江遭變錄一卷

丞相上蔡朱勝非藏一撰記苗劉作難至復辟事

建炎復辟記一卷

無名氏

建炎通問錄一卷

宣教郎傅雱撰建炎初李丞相綱所進

非狩聞見錄一卷

幹當龍德宮曹勛功顯撰勛扈從非狩以徽廟御札

間道走行在所以建炎二年七月至南京

非狩行錄一卷

蔡絛王若冲撰

戊申維揚錄一卷

無名氏

維揚過江錄一卷

欽定四庫全書

直齋書錄解題卷五

三五

尚書左丞葉夢得少蘊撰

已酉航海記一卷

中書舍人李正民撰又名建炎居邠記

建炎假道高麗錄一卷

楊應誠撰取道遼東奉使金國不達而還

紹興講和錄二卷

無名氏

亂華編三十三卷

知盱眙軍東平劉荀子卿編其前有小序數語云方敬塘割幽燕遺契丹之日孰知為本朝造福之原哉逮王安石創新法為闢國之謀又孰知紹述者召禍之酷哉所集雜史傳記近三十種荀忠肅丞相諸孫也

元祐黨籍列傳譜述一百卷

龔頤正撰以諸臣本傳及誌狀家傳遺事之類集成之其事跡微晦史不可見者則采拾諸書為之補傳

凡三百九人其闕者四人而已淳熙中史院取其書以修四朝國史洪邁奏乞甄錄補和州文學後賜出身詳見編年類頤正給事中原之曾孫也

紹興正論二卷

序稱瀟湘野夫不著名氏錄文武官不附和議及忤秦檜得罪者

紹興正論小傳二十卷

宗正寺主簿鄞樓昉賜叔撰以正論中姓名倣元祐

黨傳為之

三朝北盟會編二百五十卷

直秘閣清江徐夢莘商老撰輯諸書二百餘家分上中下上為政宣二十五卷中為靖康七十五卷下為炎興百五十卷

北盟集補五十卷

夢莘以前書詮載不盡者五家續編次於中下二帙以補其闕靖康炎興各為二十五卷

中興十三處戰功錄一卷

參政眉山李壁李章撰中興以來禦寇立功惟此十三處編為一書所謂司勲藏其貳者也開禧乙丑北事將作其書成

建炎以來朝野雜記甲乙集共四十卷

李心傳撰上自帝系帝德朝政國典下及見聞瑣碎皆錄之蓋南渡以後野史之最詳者

西陲泰定錄九十卷

李心傳撰記吳曦叛逆以及削平本末起嘉泰辛酉迄嘉定辛未為三十七卷其後蜀事益多又增修至辛巳之冬通為九十卷仍頗用太史公年表例併記國家大政令邊防大節目首尾二十年

典故類

貞觀政要十卷

唐吳兢撰前題衛尉少卿兼修國史按新舊書列傳兢未嘗為此官而書亦不記歲月但其首稱良相待

中安陽公中書令河東公亦未詳為何人館閣書目
云神龍中所進當攷

魏鄭公諫錄五卷

唐尚書吏部郎中琅邪王絃撰絃字方慶以字行相
武后其為吏部當在高宗時館閣書目作王琳誤也
所錄魏公進諫奏對之語又名魏文貞公故事

翰林盛事一卷

唐剡尉常山張著處晦撰紀儒臣盛事自武德中迄

于天寶首載張文成七登科者即著之祖也

衣冠盛事一卷

唐武功蘇特撰

李司空論事一卷

唐大中史官蔣偕錄司空者李絳深之元和宰相也

太和辨謗畧三卷

唐宰相李德裕撰初憲宗命令狐楚等為元和辨謗畧十卷錄周秦漢魏迄隋忠賢罹讒謗事迹德裕等

刪其繁蕪益以唐事裁成三卷太和中上之集賢學士裴潁為之序元和書今不存邯鄲書目亦止有前五卷

秦傳王璽譜一卷

題博陵崔逢修協律郎嚴士元重修河中少尹魏德

謨潤色

案文獻通攷宋史藝文志俱作魏德謨原本作德譽誤今改正

國璽傳一卷傳國璽記一卷

傳無名氏所記止唐肅宗記稱嚴士元與前大同小

異

玉璽雜記一卷

徐景撰乾元元年七月記唐志有徐景玉璽正錄即此書也

楚寶傳一卷

杜確撰肅宗乾元二年楚州尼真如獻寶事

八寶記一卷

無名氏大觀二年

唐文宗朝備問一卷

不著名氏雜錄唐朝典故

通典二百卷

唐宰相京兆杜佑君卿撰採五經群史歷代沿革廢
置羣士論議迄於天寶凡為八門曰食貨選舉職官
禮樂兵刑法州郡邊防貞元中表上之李翰為之序
初劉秩為政典三十五篇佑以為未盡廣而成之

續通典二百卷

翰林學士承旨大名宋白太素等撰咸平三年奉詔
四年九月書成起唐至德初迄周顯德末王欽若言
杜佑通典上下數千載為二百卷而其中四十卷為
開元禮今之所載二百餘年亦如前書卷數時論非
其重複

國朝通典二百卷

不著名氏或言魏鶴山所為似方草創未成書也凡
通典會要前志及館閣書目皆列之類書按通典載

古今制度沿革會要專述典故非類書也

唐會要一百卷

司空平章事晉陽王溥齊物撰初唐德宗時蘇冕撰四十卷武宗朝崔鉉續四十卷至是溥又采宣宗以降故事共成百卷建隆二年正月上之按唐志蘇冕會要四十卷續會要四十卷楊紹復等撰崔鉉監修而會要稱杭州刺史蘇弁與兄冕纂國朝故事為是書弁聚書至二萬卷次於集賢芸閣弁字元容武功

人武后宰相良嗣之從孫冕仕為京兆士曹并判度
支以腐粟給邊坐貶冕亦廢

五代會要三十卷

王溥撰

六朝國朝會要三百卷

監修國史華陽王珪禹玉撰始仁宗命纂修自建隆
至慶歷四年成八十五卷熙寧三年珪為學士承旨
乞續修至熙寧十年總二十一類八百五十五門

宋文

獻通攷作總一十一
類八百五十八門

舊書亦略增損為三百卷

政和重修國朝會要百十卷

先是王禹玉監修自建隆至熙寧凡三百卷崇寧中
重修僅成吉禮百十卷政和進呈餘四類編治垂成
宣和庚子罷局遂成散漫紹興間少蓬程俱申請就
知桂州許中家借抄之許中嘗與崇寧修書故存此
本得以備中禁之採錄今重修本題淮康軍節度使
充禮制局詳議官蔡攸等奉勅重修

續會要三百卷

監修仙井虞允文并甫等上自紹興十年編修起元豐元年迄靖康之末乾道六年書成

中興會要二百卷

監修晉江梁克家叔子等上乾道六年既進續會要有旨自建炎元年續修止紹興三十二年九月成書
國朝會要總類五百八十八卷

李心傳所編合三書為一刻於蜀中其板今在國子

監

三朝寶訓三十卷

翰林學士李淑等撰天聖五年監修國史青社王曾孝先奏乞用唐吳兢貞觀政要故事取三朝聖語政事及臣僚奏對不入正史者別為一書與國史實錄並行至十年書成詔以寶訓為名其後進讀於邇英延義今館閣書目以為二十卷富弼所上者非也乃政要爾

三朝訓鑑圖十卷

學士李淑楊偉等修纂慶歷八年偉初奉旨檢討三朝事迹乞與淑共編且乞製序皇祐元年書成頃在莆田有售此書者亟求觀之則已為好事者所得蓋當時御府刻本也卷為一冊凡十事事為一圖飾以青赤亟命工傳錄凡字大小行廣狹設色規模一切從其舊敘衽鋪觀如生慶歷皇祐間目覩聖作明述之盛也按館閣書目載此書云繪采皆闕至續書目

乃云得其全未知果當時刻本乎抑亦摹傳也

三朝政要二十卷

宰相河南富弼彥國撰慶歷三年弼為樞副上言選
官置局以三朝典故分門類聚編成一書以為模範
命王洙余靖孫甫歐陽修同共編纂四年書成名太
平故事凡九十六門每事之後各釋其意至紹興八
年右朝議大夫呂源得舊印本刊正增廣名政要釋
明策備上之於朝館閣書目指政要為實訓非也

兩朝寶訓二十卷

禮部郎中長樂林希子中編進用天聖故事也元豐六年表上

仁皇訓典六卷

翰林侍講范祖禹撰元祐八年經筵所上凡三百七十七條大畧亦用寶訓體

歷代年號并宮殿等名一卷

丞相饒陽李昉明叔在翰苑時所纂

朝制要覽五十卷

屯田郎中宋咸撰此書傳於陸放翁氏放翁書其後
曰先君會稽公晚歲喜觀間為子弟講論因率至
夜分會稽公者其父宰元鈞也其書作於嘉祐中皆
國初故實觀之使人有感焉

景德會計錄六卷

丞相吳郡丁謂謂之撰時為三司使序言歲收兩京
十七路帳籍四萬四百有七日入疾徐事一千五百

文移倍之倣李吉甫國計簿賈耽國要圖總其目得四十列為六卷一戶賦二郡縣三課入四歲用五祿食六雜記大抵取景德中一年為準

皇祐會計錄六卷

樞密信都田況元均權三司使時所撰倣景德之舊取一歲最中者為準又為儲運一篇以補其闕

春明退朝錄三卷

龍圖閣直學士常山宋敏求次道撰所記多故實其

父宣獻公綬居第在春明坊如晁氏稱昭德也

先朝政範一卷

直集賢院徂徠石介守道編進自任將至悔過凡十

二篇

尊號錄一卷

丞相安陸宋庠公序撰大意以為徽號夸詡非古而我祖宗往往謙遜不居猶願超然遠覽盡屏前號其愛君以德者歟至神宗遂卻不受至於今行之

輔弼名對四十卷

天禧中前進士劉顏編自漢迄五代為四十門

青社賑濟錄一卷

丞相富文忠公弼青州揀荒施行文牘也

元豐問事錄二卷

光祿寺丞李德舅撰德舅邯鄲李淑之子元豐中為

詳定官制檢討文字詔旨所問奏藁錄為此書

官制局紀事一卷

李德裕奉旨編錄置局以來命官等事

中書備對十卷

太常丞檢正戶房公事管城畢仲衍夷仲撰凡一百二十五門附五十八事

呂申公掌記一卷

丞相申國呂公著晦叔撰在相位所記人材已用未用名姓及事當行已行條目

元祐榮觀集五卷

左朝奉大夫權太學正汪浹撰記元祐六年視學本末并羣臣所上詩賦頌表之類張舜民芸叟為之序
泰陵故事二十卷

不著名氏皆叙宣仁臨朝九年中制誥表章奏議之屬

四明尊堯集一卷

司諫延平陳瓘瑩中撰專辨王安石日錄之誣僭不孫與配食坐像之為不恭瓘初在諫省未以安石為

非合浦所著尊堯集猶回隱不直未乃悔之復為此書以謂蔡卞專用日錄以修神宗實錄薄神考而厚安石尊私史而壓宗廟以是編類其語得六十五條總而論之坐此羈管台州

尊堯錄八卷

延平羅從彥仲素撰從彥師事楊時而李侗又師從彥所謂南劍三先生者也從彥當靖康初以為本朝之禍起於熙豐不遵祖宗故事故採四朝事為此錄

及李沆寇準王旦王曾杜衍韓琦范仲淹富弼司馬
光程顥名輔巨儒十人言行附於其後未有別錄一
卷專載司馬光論王安石陳瓘論蔡京奏疏欲上之
朝不果嘉定中太守劉允濟得其書奏之且為版行
本朝事實三十卷

右承議郎李攸撰

案文獻通考攸作李伋

雜錄故事不成條貫統

紀

皇朝治迹統類七十三卷

眉山彭百川叔融撰畧用袁樞通鑑本末條例為前集四十卷中興後事為後集三十三卷

皇朝事類樞要二百五十卷

蜀人張和卿編集為一百五十門蓋舉子答策之具也

東家雜記二卷

右朝議大夫孔傳撰歷代追崇先聖故事及孔林古跡傳蓋先聖四十七世孫也

長樂財賦志十六卷

知漳州長樂何萬一之撰往在鄞學訪同官薛師雍
子然凡案間有書一編大略述三山一郡財計而累
朝詔令申明沿革甚詳其書雖為一郡設於天下實
相通問所從得薛曰外舅陳止齋修圖經欲以為財
賦一門後緣卷帙多不果入因借錄之書無標目以
意命之曰三山財計本末及來莆田為鄭寅子敬道
之鄭曰家有何一之長樂財賦志豈此耶復借觀之

良是其間亦微有增損末又有安撫司一卷併鈔錄
附益為全書

內治聖鑑二十卷

起居舍人兼嘉王府贊讀清江彭龜年子壽撰取列
聖修身齊家教子訓齊宗室防制外戚宦官警御等
事以紹熙五年表上之光宗稱善且曰祖宗家法最
善漢唐所不及也

高宗聖政草一卷

陸游在隆興初奉詔修高宗聖政草創凡例多出其
手未成而去私篋不敢留藁他日追記得此錄之而
書其後凡二十條

高宗孝宗聖政編要二十卷

高宗聖政五十卷孝宗聖政五十卷乾道淳熙中所
修皆有御製序此二帙書坊鈔節以便舉子應用之
儲者也

孝宗聖政十二卷

亦書坊鈔節比前為稍詳

會稽和買事宜錄七卷

浙東帥鄱陽洪邁景廬提舉常平三山鄭湜補之集
初承平時預買令下守越者無遠慮凡一路州縣所
不受之數悉受之故越之額特重以匹計者十四萬
六千九百居浙東之半人戶百計規免皆詭為第五
等戶而四等以上戶之害日益甚於是有為畝頭均
科之說者帥鄭丙少嘉憲邱崇宗卿張詒君卿頗主

之由淳熙十一年以後略施行而議者多以勅科五等戶為不便參政李彥穎秀叔尚書王希呂仲行先後帥越皆言之而王畫八事尤力會光廟亦以為貽貧弱之害戶部尚書葉翥叔羽奏乞先減四萬四千餘匹止以十萬為額而後議均敷詔從之仍令侍從集議皆乞闕併詭挾

案文獻通攷
闕字作闕誤

遂詔邁提措置既

畢以施行次第類成此書時紹熙元年也

劉忠肅救荒錄五卷

王居仁撰淳熙乙未樞密劉珙共父帥江東救荒本
末嘉定乙亥真景元刻之漕司以配富鄭公青社之
編而以劉公行狀謚議附錄於後

西漢會要七十卷東漢會要四十卷

武學博士清江徐天麟仲祥撰以二史所載漢家制
度典章散於紀傳表志者倣唐以來會要體分門編
纂其用力勤矣其言范蔚宗志藁為謝儼蠟以覆車
劉昭因蔚宗遺緒注而補之夫既曰蠟以覆車安得

復有遺緒蓋未攷昭之所著實司馬紹統續漢書志

也仲祥乙丑進士世有史學其世父夢莘商老著北

盟會編

案著北盟會編者乃徐夢莘原本作夢莘誤今改正

父得之思叔為左

氏國紀兄筠孟堅作漢官考皆行於世

漢制叢錄三十二卷

案宋史藝文志作二十卷文獻通攷作三十三卷

袁夢麟應祥撰以二漢所記典故分門編類凡二十

五門

平陽會四卷

通直郎知平陽縣汪李良子駟撰平陽號難治為泚東三陽之冠李良治有聲迺以一邑財計自兩稅而下為二十一篇終於歲會旁通沿革本末大畧備矣又為外篇五條如砧基副本催科檢放及書手除科數之類以為此財用所從出也李良端明應辰之孫佳士且能吏也得年不永士論惜之

唐昌計二卷

案計字文獻通攷作記

知昌化縣趙希堊克家撰

直齋書錄解題卷五